

SR. BETICO CROES TABATA UN FIGURA CHARISMATICO

GRANJESTAD (NOTAR)
Na ocasion di entiero di e Lider Maximo Sr. G.F. Betico Croes dia 30 di November Sr. Nel O. Oduber a bisa e siguiente palabranan den su discurso.
Awe mi tin e tristo y dificil tarea pa tuma despedida di un gran Arubano, un di Aruba su bon juinan cu a haci historia.
Diezun luna pasa na un manera inexplicable un accidente di auto a separabo temporalmente di nos.
Apesar di tur cos nos taba-

ta tin e speranza y anhelo cu Todopoderoso lo yudabo recupera bo salud pa di e forma ey nos lo por tin bo memei di nos atrobe.
Pero ariba e anochi di diamars pa diarazon nos a ser sorprende na Aruba cu e noticia tristo cu Sr. Betico Croes a fallece inesperadamente na Utrecht, Hulanda.
Aruba a perde un di su gran juinan y nos Partido MOVIMIENTO ELECTORAL DI PUEBLO a perde su Lider.

KENDE TABATA SR. BETICO CROES?
Betico Croes como joven, maestro cu sentimentonan social.
Na aña 1959 Sr. Betico Croes a gradua pa su akte na Hilversum, Hulanda.
T'e 1969 el a para dilanti klas na Sint. Antonius College na Santa Cruz, su lugar di nacemento.
E tabata tin un stimacion unico pa juventud.
Sr. Betico Croes a yuda hopi alumnonan desinteresadamente cu nan huiswerk.
E tabata pa añanan largo dirigente di coro di Santa Cruz, Lider ariba terreno deportivo na Club Estrella, cantante di "Estrella Musical" y un gran deportista ariba terreno di ping-pong.
Su stimacion y aprecio pa nos cultura e tabata expresele na un forma activo door di participa desde inicio di e concurso di dandé na fin di aña cu: "Betico y su grupo".
Su stimacion pa su isla natal Aruba a ponele drenta politica activo.
BETICO CROES COMO POLITICO Y ESTADISTA
Na aña 1967 el a drenta e arena politico.
Den mesun aña el a ser eligi pa Pueblo cu votonan di preferencia y eligi door di Parlamento di Aruba como diputado di entre otro ensenanza.
Dia 9 di Februari 1971 Sr. Betico Croes a funda su propio Partido "MOVIMIENTO ELECTORAL DI PUEBLO".
Betico tabata un idealista grandi.
Na e prome eleccion cu e Partido recién funda e tempo ey a participa a duna nos Partido 7 asientos, locual tabata 1/3 parti di e electorado Arubano.
E lucha primordial di M.E.P. tabata pa cambio-

nan ariba terreno estatal.
Sr. Betico Croes a haci e pueblo Arubano consciente di su propio identidad y e derecho pa nos determiná nos propio destino estatal.
PUEBLO tuma bo destino den bo mes man, tabata su lema.
Den prome instancia e lucha di e Pueblo Arubano a haya poco respons cerca Hulanda y Antiyas.
Gracias na e sosten di mayoria di e Pueblo Arubano y e perseverancia di Sr. Betico Croes, Hulanda a scucha mediante articulo 26 di E.R.N.A. di e tempo aya, e deseo ferviente di e Pueblo di Aruba di ta liber.
Dia 20 di April 1978 a sera e Protocol di Willemstad entre Hulanda-Gobierno di Antiyas y Aruba.
Na aña 1979 a sali e rapport di Comicion di Reino.
Na aña 1981 e prome Conferencia di Mesa Redonda.
Na aña 1982 Comicion di 7 a publica su rapport.
Na aña 1983 Conferencia di Mesa Redonda.
Resultado: 1-1 - 1986 Status Aparte, Aruba pais den Reino cu su propio Gobernador, Parlamento y Consejo di Ministernan.
1 - 1 - 1996 Aruba lo bira independiente den un comunidad cu Hulanda.
Sr. Betico Croes tabata un figura charismatico cu tabata stima su Pueblo tabata apreciele inmensamente.
Sr. Betico Croes a dedica gran parti di su bida na e lucha di nos Pueblo pa ta doño den su mes cas.
Lastimamente e mes no por a celebra dia 1-1-1986, e dia historico di Status Aparte.
E aprecio y simpatia grandi cu nos Pueblo Arubano tin pa Betico Croes lo pone cu nos lo no lubidele nuaca.
Su morto repentino lo laga pa nos un vacío politico.
E reconocimiento grandi cu Sr. Betico Croes a goza tanto ariba terreno nacional y internacional ta e prueba palpabel di su calidatnan excepcional como gran politico y estadista.
Nos Partido hunto cu e familia tabata kier a dunabo e entiero cu un gran Lider merece, nos kier dunabo e ultimo honornan cu abo mester haya for di Movimiento Electoral di Pueblo y Bo pueblo cu kier bo tanto.
Bao di bo guia nos a gana como Partido M.E.P. eleccionnan sucesivamente di Staten di Antiyas y Parlamento di Aruba na aña 1973- 1975- 1977- 1979 y 1983.
Betico Como Lider a haci hopi sacrificio tanto personalmente como familiarmente pa realiza e ideal di nos Pueblo Arubano.
Tristo tabata cu e no taba-

mira siquiera un dia di e realisacion di su ideal.
E no tabata por a biba e momento historico cu nos. E momento cu: "Lo imposible a wordu jubila" e no por a pasa mei mei di su pueblo.
Aruba a perde den Betico Croes un gran Arubano.
E aprecio inmenso cu Sr. Betico Croes semper por a goza di dje na Aruba, Corsow, Bonaire, Isla Arriba y na Hulanda a dunale e inspiracion y forza pa sigui lucha y e a etala su mes como un politico cu a haci historia den Reino Hulandes.
Apesar di un claro NO di Hulanda y Antiyas Sr. Betico Croes a keda persisti bao di e motto: "si naturaleza mes por ta stroba nos lucha, nos ta bringa contra dje t'e na e momento cu nos ser scucha."
Bao di su liderazgo un deseo ferviente cu tabata biba den e Pueblo Arubano a bira realidad.
Ta facil pa bisa cu baymento di Sr. Betico Croes ta deseo di Dios, pero simplemente e hecho cu e ta bay pa eternidad ta dificil pa acepta pa su familianan, nos partido y e Pueblo.
Nos lo no mira bo mas den Pueblo, toch nos lo mester respecta voluntad di Dios.
Betico bo a pone bo oponentenan politico respecta bo como negociador.
Locual 50 aña ñango nan a bisa e Pueblo Arubano cu no por: Abo a realiza.
Bo a cumpli cu un promesa haci na bo Pueblo, bo a salvaguardia honor y dignidad di locual ta biba cerca di tur Arubano.
Bo hogar a sufrí hopi door di bo trabao nan politico.
Bo tabata tin tempo y e pasenshi cu Dios a duna bo pa sinta scucha pover y rico y sin distincion politico.
E arte y don natural cu bo tin ta poco den cada siglo Dios ta duna un Pueblo un Lider cu tin tanto calidatnan asina den otro.
Aruba ta yora awe y ta diluto, Nos a perde un gran Arubano.
Locual el a haci pa Aruba lo bay den historia pa e generacionan cu ta bin por lesa ken tabata e berdadero politico sincero cu a duna su Pueblo locual tabata biba y reina den curason di un y tur.
Betico: bo familianan, bo coleganan di e partido cu bo a funda, directivanan, lidernan di barrio, votadornan, sympatisantenan y henter e Pueblo ta tristo awe.
E unico consuelo cu nos tin ta bosonan tur cu a bin tuma despedida di un bon persona, un Gran Lider y tata di Familia.
Nos Partido lo sigui mantene e espirito di lucha cu